



MENTERI KEWANGAN MALAYSIA

PRAKATA

Saya kemukakan di Dewan yang mulia ini buku Anggaran Perbelanjaan Persekutuan 2023 yang mengandungi Anggaran Perbelanjaan Mengurus dan Pembangunan berteraskan 'people centric' bagi semua Kementerian dan Jabatan membiayai perbelanjaan program, aktiviti dan projek pembangunan pada tahun 2023.

Untuk memastikan proses penyediaan bajet tahunan lebih telus, Kementerian Kewangan (MOF) telah menerbitkan Kertas Konsultasi Awam berkaitan Bajet 2023 bagi mendapatkan maklum balas pihak awam ke atas beberapa topik terpilih antaranya Program Subsidi Bersasar dan Penambahbaikan Dasar Perolehan Hijau. MOF turut menerima banyak isu dan cadangan penyelesaian pihak awam secara atas talian melalui portal Cadangan Bajet 2023 serta memorandum-memorandum semasa Majlis Konsultasi Bajet 2023 dengan pihak berkepentingan sebagai input penting dalam merangka Bajet 2023. Cadangan-cadangan tersebut telah diperhalusi dan diperkemas melalui siri libat urus, perbincangan kumpulan fokus bagi bidang-bidang sasar (*targeted areas*) dan akhirnya telah dipertimbangkan untuk menjadi program dan inisiatif di bawah Bajet 2023 yang lebih inklusif dalam mencapai matlamat pembangunan mampan (SDG).

Seiring dengan momentum pemulihan ekonomi pasca COVID-19, Bajet 2023 mengekalkan penekanan kepada empat (4) fokus utama iaitu rakyat, perniagaan, ekonomi dan Kerajaan dengan tema '**Keluarga Malaysia, Makmur Bersama**'. Bajet 2023 memainkan peranan penting dalam menyokong pertumbuhan ekonomi dan memberi tumpuan kepada pelaksanaan pembaharuan untuk meningkatkan kesejahteraan rakyat, pendapatan dan perlindungan sosial serta menambah baik daya saing perniagaan dan rantai nilai. Bajet 2023 juga terus mengembang dan meneruskan projek-projek pembangunan dengan kesan pengganda yang tinggi untuk menyokong pertumbuhan melalui pelaksanaan projek/program pembangunan di bawah Rancangan Malaysia Kedua Belas (RMKe-12).

Kerajaan komited merangka strategi perbelanjaan awam dan melaksanakan pembaharuan fiskal bagi membina semula ruang fiskal Kerajaan pasca pandemik. Dengan mengambil kira jangkaan kenaikan yang berterusan dalam harga komoditi dunia dan harga makanan, tumpuan utama kini diberikan untuk mengoptimalkan perbelanjaan subsidi secara bersasar yang dapat memanfaatkan rakyat dan negara khususnya sektor-sektor khusus dan golongan yang mudah terjejas. Di samping itu, Kerajaan akan meneruskan usaha perbelanjaan berhemat serta mengurangkan ketirisan untuk memastikan nilai faedah terbaik dalam perbelanjaan. Sehubungan itu, saya yakin maklumat yang terkandung dalam buku ini telah menggariskan hala tuju yang jelas untuk kementerian dan agensi melaksanakan program, aktiviti dan projek pada tahun 2023.

YB SENATOR TENGKU DATUK SERI UTAMA ZAFRUL BIN TENGKU ABDUL AZIZ

07 Oktober 2022